

## REKADAYA PRAKARA UKUM ING CERBUNG PAK GURU ANGGITANE SUHINDRIYO : TINTINGAN SOSIOLOGI SASTRA

**Gayuh Risdian Saputro, Dr. Darni, M. Hum**

Pendidikan Bahasa dan Sastra Daerah (Jawa)

Fakultas Bahasa dan Seni

Universitas Negeri Surabaya

[badak.nglangi@gmail.com](mailto:badak.nglangi@gmail.com)

### Abstrak

Rekadaya prakara ukum minangka tumindak kurang adil kang ditindakake para penegak ukum jroning njejegake keadilan ukum. Ancase ukum kang mujudake keadilan ora bisa dirasakake kabeh masyarakat, utamane kanggo masyarakat cilik. Sawijining prakara bisa direkadaya gumantung cacahe dhuwit kang diwenehake marang penegak ukum.

Underan panliten iki ngenani kepriye wujude rekadaya prakara ukum ing cerbung *Pak Guru*. Adhedhasar underan panliten kasebut, ancasing panliten yaiku ngertenan lan njlentrehake wujude rekadaya prakara ukum kang ana ing cerbung *Pak Guru*. Paedah saka panliten iki bisa nambah wawasan lan nyengkuyung sarta ngramekake pangrembakane sastra Jawa modern kang apik lan linuwih, mliline kritik sastra kang nggunakake tintingan sosiologi sastra.

Lelandhesane teori kang digunakake in panliten iki yaiku, teori sosiologi sastra saka panemune Wellek lan Warren, yaiku ngenani isi karya sastra. Sabanjure metodhe kang digunakake ing panliten iki yaiku metodhe deskritif kualitatif. Sumber dhata kang digunakake arupa teks cerbung *Pak Guru* kang cacahe rong puluh edhis. Dhata kang digunakake arupa tembung, ukara, paragrap, dialog antar paraga, lan wacana ing cerbung *Pak Guru* kang gegayutan karo prakara kang arep ditliti.

Asile panliten kang sepisan njlentrehake wujude rekadaya prakara ukum kang dumadi nuduhake anane prakara beselan marang petugas ukum lan dumadine kekerasan ing pakunjara. Kapindho njlentrehake bab kang njalari anane rekadaya prakara ukum, yaiku keblinger marang dhuwit, ngamanake jabatan, lan kepentingan politik. Katelu pungkasane anane rekadaya prakara ukum kasebut nuwuhake rong prakara tumrape para narapidana, yaiku pasrah marang kahanan lan mbalela marang ukum. Kang pungkasane yaiku pamawase pangripta ngenani anane rekadaya prakara ukum nuwuhake saperangan guru-guru lan karyawan mbudidaya menyang pengadilan, unjuk rasa menyang pasidhangan, lan pilih masrahake marang proses ukum kang lumaku.

**Kata Kunci:** rekadaya ukum, sosiologi sastra, cerbung.

### **PURWAKA**

#### **Landhesan Panliten**

Karya sastra mujudake asil pamikiran lan pangilone saka kagiyatane manungsa minangka perangan saka masyarakat kang nyritakake sawernane perkara kang diadhepi. Karya sastra diciptakake kanggo ngrembug sawijining perkara panguripan kang ana ing bebrayan. Bisa diarani karya sastra minangka panguneg-uneg utawa pangudarasane manungsa kang arupa pamikiran, pangrasa, panemu, lan keyakinan kanthi wujud gambaran panguripan kang tinulis. Wellek lan Warren (2014:98) ngandharake yen sastra nyuguhake panguripan kang saperangan dumadi saka kanyatan sosial, senajan karya sastra uga nyonto kahanan alam lan subjektif manungsa.

Panguripan ing bebrayan kuwi sejatine uga nduweni aturan-aturan kang kaiket kang kudu diugemi dening masyarakat. Wiwit cilik, manungsa kang urip ing bebrayan wis kaiket dening aturan-aturan kang matesi tindak-tanduke (Soekanto, 1976:3). Masyarakat kang manggon ing sawijining papan tartamtu ora bisa

uwal lan kudu patuh marang sawijining aturan ukum tartamtu. Sesambungan ukum lan masyarakat kuwi rumaket lan ora bisa dipisahake siji lan sijine, jalaran ukum kang ngatur panguripan ing bebrayan, lan masyarakat minangka wadhah utawa panggonan kanggo lumakune ukum.

Rahardjo (1980:70) ngandharake ukum kuwi bisa mlaku lumantar manungsa. Jroning ukum wis ngatur ukuman saben perkara-perkara kang ditindakake dening manungsa. Minangka warga masyarakat kang apik kudu ngugemi marang aturan ukum. Sapa wae kang nerak bakal kena paukuman. Abot lan enthenge ukum gumantung saka perkara kang ditindakake lumantar putusane hakim ing pangadilan. Mula, ukum menehi paukuman kang saadil-adile tumrap sapa kang nerak aturan ukum.

Ndeleng kanyatan kang ana ing bebrayan saiki, kesadharan anggone nindakake aturan ukum lan pangeacakane durung bisa lumaku kanthi apik. Ukum wis ora ana ajine kanggo rakyat cilik. Prakara ukum bisa direkadaya sasenenge pihak panguwasa. Lumakune ukum uga tansah pilih-pilih Bebasan kaya lading, katon

landhep lan tedhas yen digunakake mengisor. Sawalike katon kethul yen digunakake mendhuwur. Tegese ukum bisa disetir dening para panguwasa, panggedhe kang ndhwени dhuwit.

Anane rekadaaya prakara ukum uga dumadi ing kasusastran Jawa. Salah sijine karya sastra kang ngemot anane rekadaaya prakara ukum ana ing cerbung "Pak Guru" anggitane Suhindriyo kang kapacak ana ing kalawarti *Djaka Lodang* wiwit nomer 10, 4 April 2012 nganti nomer 29, 15 Desember 2012. Cerbung *Pak Guru* iki onjo ing babagan ukum kang direkadaya lan cundhuk klawan apa kang dumadi ing kahanan saiki. Anane rekadaaya prakara ukum kang ditindikake dening para panegak ukum ndadekake tansaya sengsarane rakyat cilik kang kajiret prakara.

Cundhuk klawan andharan ing ndhuwur, irah-irahan panliten iki yaiku *Rekadaaya Prakara Ukum ing Cerbung Pak Guru Anggitane Suhindriyo* kanthi tintingan sosiologi sastra.

### Underane Panliten

Adhedhasar saka alesan-alesan panliten kang diandharake ing ndhuwur bisa ditintingi undherane panliten ing ngisor iki. Mula saka andharan kasebut banjur tuwu pitakonan.

- (1) Kepriye wujude rekadayane prakara ukum ing cerbung *Pak Guru*?
- (2) Apa wae kang njalari anane rekadaaya prakara ukum ing cerbung *Pak Guru*?
- (3) Kepriye pungkasane rekadaaya prakara ukum ing cerbung *Pak Guru*?
- (4) Kepriye pamawase pangripta ngenani rekadaaya prakara ukum?

### Ancase Panliten

Adhedhasar alesan lan undherane panliten ing ndhuwur bisa dijentrehake ancase nganakake panliten kaya kang disebutake ing ngisor iki.

- (1) Ngerten i lan njlentrehake kepriye rekadayane prakara ukum ing cerbung *Pak Guru*
- (2) Ngerten i lan njlentrehake apa wae kang njalari anane rekadaaya prakara ukum ing cerbung *Pak Guru*.
- (3) Ngerten i kepriye i lan njlentrehake pungkasane rekadaaya prakara ukum ing cerbung *Pak Guru*.
- (4) Ngerten i kepriye i lan njlentrehake kepriye pamawase pangripta ngenani rekadaaya prakara ukum.

### Paedahe Panliten

Panliten iki diajab bisa aweh paedah tumrap maneka perangan, yaiku :

- (1) Sastra Jawa Modern

Panliten iki kaajab bisa nambah wawasan lan nyengkuyung sarta ngramekake pangrembakane sastra Jawa modern kang apik lan linuwih, mligine kritik sastra kang nggunakake tintingan sosiologi sastra.

- (2) Pamulangan

Panliten kang nintingi sosiologi sastra iki dikarepake bisa dadi bahan ajar marang piwulangan apresiasi sastra. Panliten iki kaajab uga bisa migunani kanggo ngerten unsur-unsur karya sastra mligine kang ngonceki rekadaaya prakara ukum.

### Wewatesane Tetembungan

- (1) Sosiologi sastra

Sosiologi sastra yaiku ngelmu *interdisipliner* antarane sosiologi lan sastra (Saraswati, 2003:1).

- (2) Ukum

Ukum yaiku sistem kang digawe manungsa kanggo matesi tingkah lakune manungsa supaya tunduk marang nile-nile luhur kaya kaadilan, ketertiban, lan kaamanan (Fuady, 2013:1).

- (3) Cerbung

Cerbung utawa crita sambung yaiku sawijine asil karya sastra kang arupa crita rekan sing ditulis kanthi sambung-sinambung ing kalawarti basa Jawa (Hutomo, 1975:55-56).

### TINTINGAN KAPUSTAKAN

#### Sosiologi Sastra

Sosioloji sastra dumadi saka tembung sosiologi lan sastra. Sosiologi asale saka basa Yunani yaiku *socius* kang tegese bebrayan, dene *logos* nduwensi teges ngelmu. Dadi sosiologi yaiku ngelmu ngenani mula buka lan pangrembakane bebrayan. Sosiologi manut Roucek lan Warren (ing Soekanto, 1991:20) yaiku ngelmu kang nyinaoni sesambungane manungsa ing kelompoke. Bab iki uga salaras karo panemune Soekanto (1991:15) kang ngandharake sosiologi kalebu ngelmu sosial kang objeke yaiku bebrayan.

Damono (1978,6) njlentrehake sosiologi minangka tintingan kang *objektif* lan ilmiah. Adhedhasar panemu kasebut sosiologi nyinauni ngenani lembaga-lembaga sosial lan ekonomi, agama, politik, lan sakabebe nilai kang gegayutan karo struktur sosial. Kanthi andharan kasebut bisa dingerten i gambaran carane manungsa nyalarasake awake klawan lingkungane.

Ratna (2011: 3) ngandharake sosiologi sastra mujudake tintingan tumrap karya sastra kanthi nintingi perkara-perkara kang ana ing bebrayan. Tintingan iki uga ngupayakake kanggo nemtokake kualitas *interpedensi* antarane sastra lan bebrayan. Ing panliten sosiologi sastra iki, Ratna (2011:331) nglebokake ing panliten multidisiplin jalaran sosiologi sastra klebu panliten kang nggayutake ngelmu antarane sosiologi lan sastra.

Swingwood (sajroning Yunus,1986:4) nemokake panliten sosiologi kang nggunakake dhata sastra. Sepisan yaiku sosiologi sastra (*sociology of literature*), kang mawas saka faktor sosial kang ngasilake karya sastra ing sawetara wektu tartamtu lan ing masyarakat tartamtu. Kapindho yaiku sosiologi sastra (*literary sociology*), kang nggayutake struktur karya sastra marang *genre* lan masyarakat.

Kanthy ngerten i sesambungan antarane sosiologi lan sastra, tintingan sosiologi digunakake minangka perkara kang trep kanggo ngonceki gegayutane manungsa klawan lingkungan sosiale. Wellek lan Werren (sajrone

Kurniawan, 2012:11) ngandharake menawa ana telung paradigma sajrone sosiologi sastra. Sepisan yaiku sosiologi pangripta; inti saka tintingan sosiologi pangripta iki yaiku menehi makna sawijine pengarang minangka bagian saka bebrayan kang ngripta karya sastra. Mula kanthi ngerti ngenani pengarange bisa dadi pathokan kanggo ngerten relasi sosial karya sastra karo masyarakat. Kapindho yaiku sosiologi karya sastra; nintingi babagan sosiologi karya sastra kang nyangkup aspek-aspek sosiale. Kang pungkasan, sosiologi pamaos ; nintingi sosiologi marang pamaos kang negesi sawijining karya sastra lan nintingi daya pangaribawane sosial kang disebabake karya sastra.

Ian Watt (sajroning Damono, 1978:3) nyethakake konsep sosiologi sastra kaperang dadi telu, yaiku (1) konteks sosial pengarang, kang nduwensi sesambungan antarane kahanan sosiale pengarang ing masyarakat. Klebu faktor-faktor sosial kang bisa mangaribawani pengarang minangka pengarang saliyane dipangaribawani dening karya sastrane (2) sastra minangka kaca benggala masyarakat, kang bisa dingerten sepira adohe karya sastra dianggep utawa bisa dadi kaca benggalane masyarakat nalika karya kasebut diasilake (3) fungsi sosial sastra, kanggo ngerten sepira adohe karya sastra kasebut nduwensi piguna minangka panglipur ngrangkep minangka pendhidhikan kanggo masyarakat

## Ukum

Tembung ukum nduwensi teges kang akeh. Miturut Utrecht (Muchsin lan Putra, 2002:17), negesake yen njlentrehake tegese ukum kang pepak kuwi angel. Manut panemune, paugeraning ngenani ukum kuwi minangka pituduh-pituduuh tata tertib sawijining masyarakat lan kudu ditaati dening anggota masyarakat. Mula saka kuwi, bentuk pelanggaran apa wae ngenani pituduuh ngaurip kasebut bisa nuwuhake tindakan saka pamarintah. Kan (sajroning Muchsin lan Putra, 2002:17) ngandharake ukum ing bukune *Inleiding tot de Rechtswetenschap*, yaiku sakabehe aturan ngaurip kang asipat meksa kango ngayomi kepentingane manungsa jroning masyarakat

Manut teori etis (*etische theorie*), ukum sadherma kango mujudake kaadilan. Ukum nduwensi tugas kang suci, yaiku menehi kaadilan tumrap manungsa kang nduwensi hak nampa (Utrecht sajroning Muchsin lan Putra, 2002:21). Ukum digawe kango ngatur bebrayan kanthi ayem lan tentrem. Ukum nengenake urip kang tentrem. Katentreman ing antarane manungsa dpikukuhi dening ukum kanthi ngayomi kepentingane manungsa tartamtu, yaiku rasa kurmat, kamardikan, bandha lan jiwa, lan liya-liyane kang asipat ngrugekake. Kepentingan pribadhi lan kepentingane kelompok manungsa mesthi nuwuhake beda panemu siji lan sijine. Anane beda panemu iki ndadekake crah siji lan sijine kang yem ora kaaatur dening ukum kango nyiptakake urip tentrem.

Sacara umum ancasing ukum yaiku ngatur masyarakat supaya tumindak kang tertib jroning bebrayan kanthi mujudake swasana kang tentrem, njaga masyarakat supaya ora tumindak rusuh lan culika kanthi mutusake ukum dhewe sarta ngupaya kaadilan kango saben manungsa saka hak-hake saengga nuwuhkae masyarakat kang tertib, bagya lan tentrem. Ukum bisa ditegesi

minangka aturan utawa putusan kang tinulis apa dene tanpa tinulis kanggo ngatur panguripane masyarakat lan nyawisake sangsi kanggo sapa kang nerak ukum.

Pangelompoke ukum kang umum dumadi saka rong perangan, yaiku ukum *publik* (pidana) lan ukum *private* (perdata). Ukum pidana yaiku ukum kang ngatur antarane subjek ukum jroning perkara tumindak-tumindak kang diutamakake lan dadi larangane undang-undang, saengga katetepake sangsi arupa pidana utawa dhendha kanggo sapa kang nglanggar. Ukum pidana ngatur sesambungan antarane manungsa klawan masyarakat kang dicakake nalika masyarakat kasebut bener-bener mbuthuhake.

## Proses Pangadilan Ukum

Panegakan ukum minangka punjere saka kagiyatan ukum kang diwiwiti saka reng-rengane ukum, pembentukane ukum, panegakan ukum lan evaluasi ukum. Panegakan ukum minangka interaksi antarane tumindake manungsa kang makili kepentingan-kepentingane kang wis katetepake. Proses panegakan ukum nduwensi dimensi kang jembar jalanan panegakan ukum ngatutake dimensi tumindake manungsa. Kanthi mangkono perkara-perkara ukum kang mesthi onjo yaiku perkara "*law in action*" dudu "*law in the book*" (Rahardjo, 1983:35).

Panegakan ukum kang lumaku samesthine kudu menehi paedah utawa piguna kanggo masyarakat. Sejene ngono masyarakat uga ngarep-arep anane panegakaan ukum kanggo mujudake kaadilan. Senajan kaya mangkono, ora bisa diselaki apa kang dianggep nduwensi piguna (sacara sosiologis) durung karuhan adil, sawalike apa kang dirasakake adil (sacara filosopis) durung karuhan nduwensi paedah tumrap manungsa.

Radbruch (sajroning Rahardjo, 1983:38) ngandharake ukum kuwi kudu nyangkup karya minangka nilai dhasar ukum. Nilai dhasar ukum kasebut yaiku, kaadilan, kagunan, kepastian ukum. Katelune nduwensi kaya dumadine panemu kang ora padha. Aparat panegak ukum kang kajibah jroning tugas panegakaan ukum diwiwiti saka saksi, polisi, advokad, jaksa, hakim, lan petugas sipir. Polisi minangka unsur utama ing tata pangadilan pidana, uga minangka alat pengendalian sosial formal lan informal kang ana ing masyarakat (Kusumah, 1983:49).

Ukum lan kaadilan mujudake perangan kang ora bisa dipisahake. Kalorone nduwensi sesambungan kang raket. Tanpa disadharti nalika krungu tembung ukum, sacara ora langsung ukum nduwensi sesambungan marang kaadilan. Dene kaadilan uga dipangaribawani ngenani perkaran panegakan ukum. Tembung-tembung kang kerep digunakake dening para ahli ukum nalika menehi pangalembana lan panyaru ukum ora ninggal saka tembung adil lan ora adil. Para ahli ukum kerep ngandharake kaya-kaya kaadilan lan moralitas minangka rong perangan kang bisa

Kaadilan miturut Webster (sajroning Pound, 1965:9) yaiku kepentingane manungsa kang paling luhur ing ndonya iki. Ana ngendi wae papane kaadilan kuwi kang digoleki manungsa, diperjuwangake, lan

diantu kanthi kapercayan. Tanpa anane kaadilan bakal antuk panantang saka masyarakat. Kawiwitan saka masyarakat kang teratur lan lembaga-lembaga kang ngatur kaadilan minangka perkara utama kang kudu antuk kawigaten.

### Lelandhesane Teori

Cundhuk klawan andharan kasebut, panliten iki bakal nggunakake konsep teori sosiologi sastra saka panemune Wellek lan Warren, yaiku sosiologi bab isi karya sastra kang ancuse kanggo nintingi babagan sosiologi karya sastra kang nyangkup aspek-aspek sosiale. Saka kono bakal ditintingi struktur isi karya sastra kang nduwensi gegayutan karo bab rekada ya prakara ukum ing bagian ukum pidana. Kanggo ndhudhah rekada ya prakara ukum, bakal nengenake rasa keadilan saka panemune Webster.

### METODE PANLITEN

Methodhe panliten mujudake perangan kang wigati jroning nindakake panliten iki. Metodhe iki digunakake kanggo ngonceki objek panliten lan minangka tata cara kang digunakake panliti kanggo ngumpulake dhata panliten. Ing metodhe panliten iki bakal diandharake ancangane panliten, sumber dhata lan dhata, instrumen panliten, tata cara ngumpulake dhata, tata cara analisis dhata, lan tata cara nulis asile panliten. Sakabehe metodhe kasebut diajab supaya menehi asil panliten kang murakabi.

### Ancangan Panliten

Panliten karya sastra minangka panliten kang arupa tembung-tembung dudu panliten kang arupa angka-angka. Mula saka kuwi, metodhe kang digunakake kudu selaras karo jinise panliten kang dianakake, yaiku nggunakake metodhe kualitatif. Bogdan lan Taylor (sajrone Moleong, 2005:4) ngandharake menawa panliten kualitatif yaiku *prosedur* panliten kang ngasilake dhata *deskriptif* kang arupa tembung-tembung tinulis utawa lisan saka manungsa kang tumindake bisa diamati

Adhedhasar andharan kasebut, metodhe kang digunakake ing panliten iki yaiku metodhe deskriptif kualitatif. Metodhe deskriptif kualitatif nduwensi teges data kang ditintingi lan asil tintingane awujud fenomena, ora awujud angka-angka utawa koefisien kang ana gegayutane karo variabel (Aminuddin, 1990:15). Ing metodhe iki nggunakake cara penafsiran kang nyuguhake kanthi cara deskripsi kang cundhuk klawan kanyatan.

### Sumber Dhata lan Dhata

Sumber dhata ing panliten iki minangka sumber dhata primer lan sekunder. Sumber dhata primer yaiku sumber dhata kang langsung menehi data tumrap panliti (Arikunto, 2005:128). Sumber dhata primer ing panliten iki arupa teks cerbung basa Jawa ing kalawarti *Djaka Lodang* kang kapacak wiwit nomer 10 tanggal 4 April nganti nomer 29 tanggal 15 Desember 2012.

Dene sumber dhata sekunder yaiku sumber dhata kang ora langsung menehi dhata tumrap panliti (Arikunto, 2005:128). Sumber dhata sekunder kan digunakake ing

panliten iki gegayutan karo sosiologi sastra, dhata kang dikutip saka koran lan internet kang ana gegayutan karo panliten.

Dhata kang bakal ditintingi ing panliten iki yaiku tembung-tembung utawa ukara kang nggambaraké rekada ya ukum ing cerbung *Pak Guru*.

### Instrumen Panliten

Instrumen panliten yaiku perangan kang digunakake kanggo nindakake panliten. Kang dadi instrumen panliten ing cerbung *Pak Guru* yaiku panliti dhewe. Minangka instrumen panliten, panliti kudu nindakake panliten dhewe kanthi maca teks sastra supaya bisa ngonceki wosing crita kang ana ing cerbung *Pak Guru*. Dene piranti kang nyengkuyung anane panliten iki yaiku alat tulis kaya ta pulpen, buku tulis, spidol lan kertas.

### Tata Cara Ngumpulake Dhata

Ing panliten iki bakal nggunakake metode panliten kapustakan. Panliten kapustakan nuduhake tata carane nindakake panliten adhedhasar naskah kang wis diterbitake arupa buku utawa kalawarti. Salah sijine kanggo nindakake panliten pustaka iki yaiku kanthi cara maca dibolan-baleni. Miturut Ratna (2004:18) maca objek karya sastra kudu dilakoni nganti bola-bali supaya kabeh unsur karya bisa dingertenai kabeh.

### Tata Cara Analisis Dhata

Kanggo nganalisis dhata, panliten iki nggunakake metodhe analisis hermeneutika, kang tegese negesake utawa *interpretasi*. Metodhe hermeneutika nyoba ngerteni makna karya sastra kang ana ing strukture. Kanggo ngasilake dhata-dhata kasebut bakal nggunakake cara kanthi nafsirake lan milihi perangan-perangan kang ana gegayutane karo rekada ya prakara ukum ing cerbung *Pak Guru*.

Adhedhasar andharan kasebut cara kang digunakake kanggo nganalisis dhata kaya kang diandharake ing ngisor iki :

- 1) Maca kanthi njlimet dhata kang wis diklumpukake banjur dibolan-baleni anggone maca.
- 2) Nyathet lan merang dhata kang bakal digunakake ing panliten.
- 3) Ngandharake lan merang dhata adhedhasar undheraning panliten.
- 4) Nganalisis data kanthi teori-teori kang sadurunge wis diterangake lan dijilentrehake ana ing perangan-perangan sadurunge saka tulisan iki. Analisis dhata iki diwiwiti nalika inventari, klasifikasi, lan inteprestasi konsep-konsep sosial lan digayutake karo kanyatan.
- 5) Ngandharake asile panliten kang luwih cetha adhedhasar undheran lan ancuse panliten.  
Ndudut asiling panliten kang sabanjure uga dilebokake ana ing laporan asiling panliten.

### ANDHARAN ASIL PANLITEN

## Wujude Rekada ya Ukum ing Cerbung

Prakara ukum kang direkada ya dening aparat penegak ukum kanthi ancas kanggo kepentingan pribadhine. Ing ngisor iki bakal dijentrehake siji mbaka siji wujude prakara ukum kang direkada ya kasebut.

### (1) Anane Beselan

Besel miturut Poerwadarminta (1994,43) tegese dhuwit reruba marang seksi utawa panggedhe. Besel minangka dhuwit sogokan kang ancuse njaluk pamrih marang panggedhe. Ing bab iki bakal diandharake pihak-pihak kan nindakake beselan.

Ing cerbung *Pak Guru* iki DPR dadi paraga utama kang bisa nemtokake nasibe pak Dibyo, kepala dinas pendidikan kang kadakwa nindakake korupsi proyek buku. Lumantar proyek DPR lan bupati, dhinas pendidikan dianggep ora blaka anggone nggunakake dhuwit proyek buku. DPR ndakwa yen dinas pendidikan wis ora blaka awit wis wani dolanan dhuwit proyek tanpa rembugan dhisik karo pihak *legislatif*. Lire, proposal proyek buku kang diajokake lan disarujuki bareng kuwi cacahe luwih sithik saka cacahe dhuwit sing sanyatane.

Saka andharan kasebut bisa didudut antarane bupati lan DPR ana kongkalikong. DPR dinuga nampa dhuwit beselan saka bupati kanggo menangake prakarane. Salah siji bukti kang nuduhake prakara kasebut ana ing pethikan ngisor iki.

“Slentingan njaba, pak Dibyo iku mung dikorbanake. Jare, inisiatif proyek sejatine saka DPR lan bupati. DPR oleh jatah saben anggota 10 yuta, pimpinane 200 yuta diedum wong papat. Terus bupati sing paling akeh dienggo kampanye nalika njago bupati periode keloro wingi.” (Suhindriyo, DL:16. 2012:51)

Pethikan ing ndhuwur minangka panduga menawa DPR nampa dhuwit saka bupati. Warta kasebut nyebarek tekan ngendi-endi kang ndadekake dudutan yen DPR ora mung nampa beselan saka bupati amrih kasuse ora kawiyak, nanging kanthi ora langsung uga kecipratan dhuwit geni saka proyek buku. Mung wae ing kang kajibah ngawasi langsung yaiku komisi II DPR. Mula kanthi anane panduga beselan kasebut ndadekake prakara tansah diubeng-ubengake lan digawe mbulet.

Saliyane DPR, hakim lan jaksa uga ana kang nampa beselan, kepara malah ana kang kanthi sengaja njaluk dhuwit marang tahanan utawa narapidana. Ironing ngrampungake sawenehe prakara, antarane hakim apa dene jaksa saiki kena dietung kang kangganon ati nurani. Tegese anggone nindakake pakaryane manut kaidah ukum kang cundhuk karo undhang-undhang. Salah sijine pethikan kang cundhuk klawan andharan ing ndhuwur kaya kaya ana ing ngisor iki.

Supaya kabeh urusan bisa lancar kudu migunakake dhuwit. Tumrap wong kang kena prakara, dhuwit dadi kunci pokok. Merga dhuwit sawenehe prakara bisa mandheg lan bisa terus.

Merga dhuwit , sawenehe ukuman bisa enteng utawa abot. Merga dhuwit sawenehe kahanan bisa diatur lan dikendhaleni. Mula krana dhuwit uga Prayoga Santosa lan Marulam Simanjutak sing kaloka bayarane gedhe dadi jaminan sawenehe dakwa bisa uwal saka bui (Suhindriyo, DL 27, 2012:2).

Saka pethikan ing ndhuwur nuduhake salah sawijine cara kang digunakake dening pengacarane pak Dibyo supaya bisa mertmba menyang rumah sakit. Cara kasebut ditindakake kanthi nggunakake dhuwit. Sabanjure pak Dibyo diidini dening kejaksaan mertamba menyang rumah sakit sing ateges metu saka rumah tahanan negara. Kanthi mertambane menyang rumah sakit iki ndadekake pak Dibyo tansaya ampang nganakake pirembugan klawan pengacarane. Kejaba kuwi, pak Dibyo karo pengacarane uga bisa luwih longgar nganakake sesambungan klawan kejaksaan lan kehakiman.

Lelandhesan kanyatan kang kaya mangkono nuduhake mung sethithik cacache hakim utawa jaksa kang kangganon ati resik nalika nangani sawijining prakara. Pancen ora bisa diselaki lamun ironing pengadilan ana kongkalikong antarane jaksa lan hakim. Antarane penuntut, yaiku kejaksaan lan kang ngadili, yaiku hakim menehi dalan jembar kanggo uwal saka prakara ukum, utawa saora-orane ukuman kang ditibakake bisa enteng.

Beselan uga ora dumadi ing pengadilan. Ing njero pakunjara kepara malah luwih akeh tinemu. Wis dudu rahasia umum maneh, malah-malah wis dadi tradhisi lan kabudayan anyar kang manjing ironing jiwa-jiwa sipir. Anane praktek sogok-sinogok ironing pakunjaran wis ora bisa diselaki maneh. Praktek *haram* kaya menehi tumindak lan fasilitas kang mligi ironing tahanan, menehi jasa keamanan, menehi *remisi*, amplop (duhuwit) saka kulawarga utawa wong kang teka nganti menehi ijin mlebu metu pakunjara. Salah siji bukti kang nuduhake anane beselan kasebut kaya kaya ana ing ngisor iki

Beda karo tahanan liyane, Marsono ora dilebokake sidhang. Hasan, pegawe kejaksaan sing kejibah ngurusi tahanan ngidini Marsono ketemu keluwarga, kerabat, kanca sing nekani sidhange ing sanjabane sel. Saben sidhang Hasan oleh tips Rp. 50.000 saka sisihane Marsono kanggo gantine ngluwari Marsono saka sel pengadilan (Suhindriyo, DL:20, 2012:2).

Saka pethikan ing ndhuwur bisa dideleng anane prakara beselan kang dumadi ing njero pakunjara. Ngarepake sidhang, bojone Marsono pancek kerep menehi dhuwit kanggo Hasan. Sejene supaya antuk tumindak kang beda saka petugas, Marsono uga dibebasake ketemu kulawarga lan kanca-kancane kang teka menyang pakunjaran. Anane sogok-sinogok iki ndadekake Hasan mbebeda marang Marsono lan nyebal saka kautaman anggone nindakake tugas. Yen ana kulawarga saka narapidana ora nyangoni, mesthine ora diladeni kaya ngladeni Marsono. Narapidana-narapidana kasebut ora nduwe wibawa kanggone Hasan.

Anane kasus nyogok marang sipir kuwi nuduhake isih ndrawasine pakunjaran saka tindak praktik sogok sinogok. Praktek nyogok tuwu ngrembaka saben mangsa. Siji lan sijine padha dene mbuthuhake. Narapidana butuh kadonyan, dene sipir butuh dhuwit. Bisa diarani jroning pakunjaran wis dadi kerajaan dhewe tumraping para sipir kang nduwensi kewenangan lan ora ana campur tangan saka njaba kang bisa lumebu.

## (2) Kekerasan jroning Penjara

Tumindak kekerasan yaiku tumindak kang dilakoni dening grombolan wong utawa kelompok (Douglas&Wasker, 2002:9). Ing cerbung *Pak Guru* iki uga tinemu tindak kekerasan. Kekerasan kang dumadi ing cerbung iki ditindakake dening aparat penegak ukum lan petugas jaga ing pakunjaran.

Kekerasan kang dumadi iki dibedakake miturut jinise ana rong perangan, yaiku kekerasan langsung lan ora langsung. Kekerasan langsung ditindakake ing njero pakunjara kang dumadi saka kekerasan fisik lan kekerasan seksual.

Kekerasan fisik ditindakake dening sipir marang sawenehe narapidana lan tahanan. Ancas kang sakawit kanggo ndhidhik mentale para narapidana lan tahanan kebablasen marang tumindak kekerasan. Bukti anane tumindak kekerasan kasebut kaya kang ana ing ngisor iki.

“Kanca nunggal sel ing polsek papan iki aku ditahan sepisanan ora ana sing lput saka panganiayane petugas. Wah, pokoke menawa wis mala, tahanan iku dianggep asu gudhigen.” (Suhindriyo, DL:23, 2012:45)

Pethikan ing ndhuwur nuduhake anane tumindak kekerasan kang ditindakake dening sipir. Mlebu sel sepisanan, para tahanan ora bisa lput saka tumindake para sipir. Mula, panguripan ing njero pakunjara kasebut bisa diarani nrenyuhake. Kekerasan kang dumadi gawe mirising ati. Tanpa pilah-pilih yen konangan lput ora bisa endha saka pangincime petugas.

Saliyané kuwi, sawijining tahanan wanita uga dadi korban kekerasan seksual kang ditindakake dening pulisi. Tahanan kasebut dirudapeksa nganti nuwuhake nyawa ing njero anggane tahanan kasebut. Bukti anane tumindak kasebut bisa dideleng ing pethikan ngisor iki.

“Arum mula-mula dipaksa buka pakaian dengan alasan oknum itu curiga kalau Arum membawa narkoba. Juga curiga kalau tubuh Arum ternyata dilukisi tato.”

Akhirnya Arum menuruti permintaanya. Dia terpaksa melepas pakaianya. Alamat, begitu pakaian dilepas, Arum disuruh menuruti napsu bejat oknum itu. Sambil membawa pisau yang ditempelkan dileher Arum, oknum tersebut melampiaskan napsu setannya (Suhindriyo, DL:25, 2012:37).

Pethikan ing ndhwur nuduhake anane tumindak kekerasan seksual. Sawijining oknum pulisi kasebut keblinger marang pawakan tahanan wanita kang weweg. Mula kanthi alasan *introgasi*, pulisi kasebut ngrudapeksa ing sawijining ruwangan kosong.

Kekerasan ora langsung kang dumadi yaiku anane pangincim. Anane pangincim ing cerbung *Pak Guru* iki minangka kekerasan kanthi ora langsung kang ditindakake dening petugas hukum. Sawijining jeksa kang aran Sony kanthi terang-terangan njaluk dhuwit marang kulawargane narapidana. Dhuwit kasebut minangka sogokan kanggo ngenthenagke paukumane. Abot enthenge paukuman gumantung dhuwit kang diwenehake. Salah siji bukti kang nuduhake anane pangincim kasebut bisa dideleng ing pethikan ngisor iki.

“Lho, kaya lehku omong wingi kae. Nek rong puluh juta, bojomu daktuntut sewelas sasi, mengko kenane pitung sasi. Ning nek ora gelem, ya kepeksa daktuntut telung taun kenane rong taun.” (Suhindriyo, DL:21, 2012:2).

Pethikan ing ndhuwur nuduhake pirembugane jeksa Soni lan narapidana Agus dalah bojone. Tawanane jaksa, yen gelem mbayar semono, ukumane bakal dienthengake dadi tuntutan sewelas sasi kenane mung pitung sasi. Dene yen bojone ora gelem mbayar, Agus bakal dituntut paukuman tutntutan telung taun kenane rong taun.

Apa kang wis ditindakake jeksa Soni lan pulisi kasebut klebu pangincim kang ora bisa dianggep entheng wekasane. Antarane jeksa Soni lan pulisi nduwensi unsur kang padha, yaiku ngincim kanggo nyukupi kebutuhan biologise. Mung kang mbedakake yen jeksa Soni jluntrunge tetep ora bisa uwal saka dhuwit. Anane pangincim iki bisa njalari tuwuhing ukum kang ora adil. Anane dol tinuku ukum uga ndadekake ancaman gedhe tumraping wong cilik kang nandhang prakara ukum.

## (3) Panegak Ukum Ora Njejegake Keadilan Ukum Tumrap Masyarakat

Njejegake keadilan ukum wis dadi kuwajibane para panegak ukum kaya dene, pulisi, hakim, lan jaksa. Para panegak ukum kasebut nduwensi tugas dhewe-dhewe anggone nindakake kuwajibane kang salah sijine njejegake keadilan ukum tumrap masyarakat. Masyarakat kang kejiret prakara ukum bakal diadili dening panegak ukum. Abot lan enthenge paukuman gumantung saka tumindak kang dilakoni.

Ing cerbung iki para panegak ukum ora ngecakake apa kang dadi kuwajiban utamane, yaiku njejegake keadilan ukum. Para panegak ukum kasebut anggone njejegake ukum ora nengenake keadilan. Sawalike kanggo golongan pejabat kang kesandhung prakara ukum malah antuk paukuman kang luwih entheng, kepara malah prakarane ora kecandhak petugas ukum.

Darti sing nggenteni bojone dadi buruh angkut ora kuwawa nyukupi kebutuhan keluarga

saben dinane mirungan bab mangan. Kahanan iki sing nyurung Darti nyolong roti lan susu kanggo anake kan wiwit esuk ketug awan nangis merga luwe wetenge. (Suhindriyo, DL:20,2012:51)

Pethikan ing ndhuwur salah siji conto prekara kang diadhepi Darti nalika ukum wis ora bisa dijejerake kanggone wong miskin. Anggone tumindak nyolong satemene dudu minangka pakaryan utamane. Apa maneh dijagakake kanggo nyukupi kebutuhan padinane, nanging merga kahanan kang sarwa kepepet ndadekake Darti kepeksa jejupuk barang dudu darbeke. Apes, sadurunge barang colongane mau digawa mulih, Darti kecekel dening satpam toko, banjur diglandhang lan dilebokake menyang pakunjara.

Saka pethikan ing ndhuwur bisa didudut yen sejatine wong-wong kang mlebu pakunjara kuwi durung mesthi golongan wong kang ala utawa bangsane penjahat. Akeh narapidana kang mlebu ing tahanan merga sawenehe kasus kang klebu ora abot, kaya dene , kacilakan lalu lintas, korban politik, kacingkrangan uripe, kena fitnah lan liya-liyane.

### Kang Njalari Anane Rekada ya Ukum

Para penegak ukum wani ngrekadaya prakara ukum samesthine ana ancas kang digayuh kang ana sesambungane karo kepentingan pribadi.

#### (1) Keblinger Marang Dhuwit

Dhuwit dadi sarana kanggo ngolehake samubarang kang dipengini. Kanthi dhuwit manungsa bisa tuku renrena manut senenge ati. Saben dhuwit kang ditampa manungsa cacahe uga ora padha. Akeh orane dhuwit sing ditampa gumantung karo manungsane dhewe anggone ngupaya. Faktor panggaweyan uga melu nemtokake. Saya dhuwur jabatane mesthine saya akeh dhuwit kang ditampa, ngono sawalike.

Para penegak ukum kaya dene jeksa lan hakim kuwi anggone makarya isih ngebotake dhuwit. Jeksa lan hakim bakal mbelani sapa wae sing wani menehi amplop kandel, sawalike yen ora ana pesongan ing pasidhangan, bisa uga hakim lan jeksa anggone ngrampungake prakara ora tenanan.

#### (2) Ngamanake Jabatan

Akeh cara kang ditindakake dening manungsa kanggo nggayuh jabatan. Cara-cara kasebut ana kang bener lan ana kang ora bener. Sawijining manungsa kango wis mengku jabatan ora bakal gelem yen jabatane kuwi nganti ilang. Sawalike sing ana malah kepengin tansaya diundhakake pangkat lan jabatane.

Kadhang kala yen sawijining pegawe utawa pejabat kejiret kasus ukum, mitra kerja ing lingkungane tansah kipa-kipa wisuh saka prakarane. Yen bisa malah ora cawe-cawe dadi seksi senajan ngerti kepriye larah-larahe prakara kango duamdi. Kuwi kabeh ditindakake merga ora pengin jabatane ilang sanalika jalanan kena *permainane* hakim. Awit ing njero pasidhangan ngon kebak

cangkriman, sing abang bisa dadi ijo, dene sing ijo bisa dadi abang.

“Kula mboten mangertos.” wangulan pak Pambudi cekak. Pak Pambudi uga mratelakake menawa sesambungane karo pak Dibyo mung winates minangka relationship pejabat ing kukuban pemerintah daerah. Kanthi mengkono babagan liya kaya dene kegiyatannya proyek buku babar pisan ora ngerti (Suhindriyo, DL:22, 2012:51).

Pethikan ing ndhuwur minangka andharane pak Pambudi, asisten sekretaris daerah ing pasidhangane pak Dibyo. Pak Pambudi diceluk dening jaksa merga ing sawijining prakara proyek buku kasebut, kango menehi ijin ora liya ya pak Pambudi dhew. Minangka seski kang pungkasna saka papat cacahe seksi, pak Pambudi ngakoni yen sesmbungane klawan pak Dibyo mung winates realitionship pejabat ing kukuban pemerintah daerah. Sawalike yen ngenani kasus kango ditampa pak Dibyo, pak Pambudi ora melu-melu pilih meneng wae.

Prakara kango kaya mangkono wis lumrah kadaden. Mesthi ana kango dadi bebanten kango nutupi sawijining prakara supaya ora mrambah tekan ngendi-endi. Yen wis uwah saka prakara kasebut tegese jabatane aman, merga yen nganti katut kadakwa bisa ndadekake jabatane ilang sanalika. Ya merga ngreka-reka prakara kaya mangkene iki diajab bisa menehi dalam kango ngamanake jabatane.

#### (3) Kepentingan Politik

Politik kuwi panceh panas. Samubarang yen wis magepokan karo politik bakal ndadekake kahanan bisa owah. Merga gedhine ancasing partai kango nggayuh kalungguhan, akeh dalam kango bisa ditindakake supaya bisa menangake partai kasebut, salah sijine kanthi ngorupsi dhuwit negara kango kepentingan partaine dhewe. Salah siji conto kango memper karo andharan ing ndhuwur ana ing pethikan ngisor iki.

Sebagean pegawe diknas percaya menawa prakara proyek buku sing diunggahake menyang pengadilan luwih kentehl dening kepentingan politik. Mula, pak Dibyo iku mung banten sing kudu dikorbanake amrih pejabat sandhuwure bisa slamet saka kasus korupsi sing sabenere (Suhindriyo, DL:22,2012:51).

Pethikan ing ndhuwur nuduhake yen prakara kango diadhepi dening pak Dibyo luwih kentehl mambu politik. Saka seksi cacah papat kango diajokake dening jeksa anggone mangsuli luwih mojokake marang posisine pak Dibyo lan Marsono. Seksi-seksi kasebut luwih akeh ora ngertine tinimbang kudu njentrehake apa kango dumadi ngenani kasuse pak Dibyo. Ing pasidhangan uga ora nekakake bupati, jalaran bupati dinuga uga kathut utawa melu dolanan dhuwit panas kango menangake pilkada. Para seksi ora ana kango nyebutake ana campur tangane

bupati senajan slentingan ing njaba akeh kang ndakwa yen bupati uga melu-melu.

### Pungkasane Rekada ya Prakara ukum

Anane prakara ukum kang direkadaya banget nguciwakake sakehing pihak. Ukum kang diajab bisa ditindakake saadil-adile malah dadi bahan obralan kang kanthi gampang digawe dolanan. Kanthi anane ukum kang ora adil mesthi ana pihak kang dirugekake lan pihak kang diutungake. Kanggone pihak kang diuntungake mesthi rumangsa lega merga bisa uwal saka prakara ukum. Sawalike kanggo sing dirugekake ora bakal nemoni kabegjan merga dadi korban ukum.

#### (1) Pasrah Marang Kahanan

Kanggone narapidana lan tahanan kang ora bisa nyawisi dhuwit marang jaksa, paukumane ora bisa dienthengake. Tegese, bakal nampa paukuman salaras karo putusane hakm. Kanggone wong cilik kang kejiret prakara ukum bisane mung pasrah marang kahanan kang ana.

#### (2) Mbalela Marang Ukum

Ing jagading ukum tembung mbalela wis ora aeng maneh. Prakara mbalela marang ukum tinemu ing njero pakunjaran kang ajeg ditindakake dening para narapidana. Para narapidana kasebut rumangsa ora antuk tumindak kang adil saka petugas.

Salah sawijining prakara kerusuhan kang dumadi ing cerbung iki yaiku narapdiana mbalela banjur gawe kerusuhan. Bukti kasebut bisa dideleng ing pethikan ngisor iki.

Miturut para pegawe mau para perusuh nuntut luware kanca cacah sangga sing ditahan merga didakwa doltinuku narkoba ing sanjerone Rutan (Suhindryo, DL:28,2012:2).

Pethikan ing ndhuwur dadi jalanan dumadine kerusuhan. Para tahanan ora trima merga ana kancane kang didakwa nggawa lan dol tinuku narkoba ing pakunjaran. Nalika diadani tes urin ing ruang kesehatan, para tahanan ngamuk banjur dokter Budiyanto dijojoh wetenge. Bebarengan wektu kasebut, petugas kesehatan cacah telu liyane uga didadekake sandra. Para tahanan kang tumindak rusuh kasebut kasil nguwasan kabeuh blok sel, dene saperangan mlayu saka pakunjaran liwat tembok kang dijebol.

### Pamawase Pangripta Ngenani Rekada ya Prakara ukum

Lumantar paraga, pangripta mawas ngenani anane rekada ya prakara ukum kang duamdi. Pamawase pangripta kasebut dituduhake lumantar guru-guru, karyawan, lan pak Prima. Guru-guru, karyawan, lan pak Prima nanggepi kudu tumindak kepriye ngenani anane prakara ukum kang direkadaya dening para penegak ukum. Antarane masyarakat, kalangan pegawe dhinas pendidikan dalah pak Prima ora padha anggone ndudut marang anane ukum kan ora adil.

#### (1) Mbudidaya Menyang Pengadilan

Gegayutan karo pakaryan, jabatan kepala dhinas pendidikan panceñ nduwensi pangaribawa kang gedhi. Tanpa anane kepala, sakabehing panggaweyan ora bakal bisa lumaku kanthi lancar. Ora mokal yen kanthi mangkono para andhahane pak Dibyo ngupayakake supaya pak Dibyo wurung ditahan.

#### (2) Unjuk Rasa menyang Pasidhangan

Guru-guru lan para karyawan kabeuh diajak menyang pasidhangan pangadilane pak Dibyo kang sepisanan. Ing kana bakal nganakake unjuk rasa kanthi nuntut marang petugas penegak ukum supaya pangadilan bisa negakake ukum kanthi saadil-adile tanpa ngrekadaya prakara ukum marang pihak-pihak tartamtu. Kejaksaan diajab uga bisa nggeret bupati menyang pangadilan. Prakara kang njiret pak Dibyo panceñ kenthel marang politik. Mula kaadilan ukum kudu bisa ditegakake saadil-adlile.

#### (3) Masrahake Marang Proses Ukum kang Lumaku

Tumanggape masyarakat kang kepengin netral ngenami anane prakara ukum kang direkadaya kuwi dituduhake dening pak Prima. Pak Prima kang sejatiné uga nyambi minangka wartawan *freelance* pilih netral lan ora cawe-cawe. Bab iki ditindakake krana pak Prima saliyane dadi wartawan uga dadi guru andhahane pak Dibyo. Kanthi alasan kasebut pak Prima luwih mercayakake prakarane pak Dibyo marang ukum kang lumaku.

Salah siji bukti kang nuduhake pak Prima tetep puguh marang panemune ana ing pethikan ngisor iki.

“Ya serahke wae pengadilan. Indonesia Negara hukum ta? Ateges kudu njunjung dhuwur supremasi hukum. Pengadilan sing mutusake pak Dibyo salah apa ora salah. Wong njaba rak mung gagap-gagap.”

Senajan ana panyengkuyung maran pak Prima supaya gelem cawe-cawe marang prakarane pak Dibyo, pak Prima tetep puguh marang pilihane. Pak Prima ndudut babagan ukum wis ana kang ngurusi dhewe. Semono uga karo prakarane pak Dibyo wis ana kang ngdurusi dhewe, yaiku saka pihak pengacara kang disewa dening kulawargane pak Dibyo. Ingatase negara indonesia minangka negara ukum, prayogane kudu njunjung dhuwur supremasi ukum. Dadi, kanthi pilih netral pak Prima masrahake lan mercayakake prakarane pak Dibyo marang ukum kang lumaku.

### PANUTUP

#### Dudutan

Adhedhasar andharan kasebut bisa didudut, cerbung *Pak Guru* karangane Suhindryo nyritakake rekada ya prakara ukum kang ditindakake para penegak ukum lan pihak-pihak tartamtu. Wujude prakara ukum kang direkadaya ing antarane anane beselan marang pihak-pihak tartamtu. Beselan kasebut ditujokake marang DPR, hakim lan jaksa, pulisi, lan sipir. Dumadine kekerasan ing njero pakunjara uga nambahi cacahe prakara ukum kang

direkadaaya. Saliyane kuwi, para panegak ukum uga ora njejegake keadilan ukum tumrap masyarakat.

Kang njalari anane rekadaaya ukum ing cerbung Pak Guru yaiku merga saperangan para penegak ukum keblinger marang dhuwit. Saka pihak kang kejiret perkara ukum uga ora gelem menehi katrangan kang sanyatane, ancuse kango ngamanake jabatane. Anane kepentingan politik uga nyengkuyung mula bukane prakara ukum direkadaaya.

Anane ukum kang lumaku ora adil nuwuhake saperangan masyarakat saka kalangan wong cilik mung bisa masrahak enasibe marang kahanan. Ing njero pakunjara uga dumadi kerusuhan denin narapidana kang nuntut supaya petugas ukum supaya adil anggone njejegake ukum.

Pamawase pangripta ngenani anane rekadaaya ukum, guru-guru lan karyawan dijak mbudidaya menyang pengadilan lan unjuj rasa. Dene kanggone pak Prima luwih pilih masrahake lan mercayakake marang proses ukum kang lumaku.

### Pamrayoga

Asiling panliten iki rinasa isih ana kekurangane. Kanggo panliten sabanjure kang nedya nliti sosiologi sastra kaajab supaya bisa njangkepi kekurangan-kekurangan kang ana saka panliten iki. Panliten ngenani sosiologi tinemu akeh banget cacahe. Racakae kang dirembug ora bisa uwat saka perkara sosial kang ana ing bebrayan. Mula sabisa-bisane kudu ngripta panliten kanthi pamikiran lan wawasan kang jembar supaya ngasilake panliten sosiologi sastra kang luwih beda lan apik saka panliten sadurunge.

### KAPUSTAKAN

- Arikunto, Suharsimi. 2006. *Prosedur Penelitian*. Jakarta: PT. Rineka Cipta.
- Damono, Sapardi Djoko. 1978. *Sosiologi Sastra Sebuah Pengantar Ringkas*. Jakarta : Departemen Pendidikan & Kebudayaan
- Douglas, D Jack & Waskler, Frances Chaput (ing Santoso Thomas, dkk.). 2002. *Teori-Teori Kekerasan*. Jakarta : Ghalia Indonesia
- Endraswara, Suwardi. 2008. *Metodologi Penelitian Psikologi Sastra*. Yogyakarta: Media Press.
- Fuady, Munir. 2013. *Teori-Teori Dalam Sosiologi Hukum*. Jakarta : Kencana.
- Hutomo, Suripan Sadi. 1975. *Telaah Kesustraan Jawa Modern*. Pusat Pembinaan dan Pengembangan Bahasa. Jakarta : Depdikbud
- Junus, Umar. 1986. *Sosiologi Sastera Persoalan Teori dan Metode*. Kuala Lumpur : Dewan Bahasa dan Pustaka
- Kusumah, W. Mulyana. 1983. *Kejahatan Penjahat dan Reaksi Sosial*. Bandung : Alumn
- Kurniawan, Heru. 2012. *Teori, Metode, dan Aplikasi Sosiologi Sastra*. Yogyakarta : Graha Ilmu
- Marpaung, Laden. 2006. *Asas-Teori-Praktik Hukum Pidana*. Jakarta : Sinar Grafika.
- Moleong, Lexy J. 2005. *Metodologi penelitian Kualitatif*. Bandung: PT Remaja Rosdakarya.

Muchsin lan Putra, Fadillah. 2002. *Hukum dan Kebijakan Publik*. Malang : Averoes Press.

Nurgiyantoro. Burhan. 2010. *Teori Pengkajian Fiksi*. Yogyakarta: Gajah Mada University Press.

Pound, Roscal. 1965. *Tugas Hukum*. Djakarta : Bharata

Rahardjo, Satjipto. 1980. *Hukum dan Masyarakat*. Bandung : Angkasa

Ratna, Nyoman Kutha. 2009. *Penelitian Sastra : Teori, Metode, dan Teknik*. Yogyakarta: Pustaka Pelajar.

Saraswati, Ekarini. 2003. *Sosiologi Sastra Sebuah Pemahaman Awal*. Malang: UMM Press.

Soekanto, Soerjono. 1990. *Sosiologi Suatu Pengantar*. Jakarta : Rajawal

Wellek, Rene & Austin Werren. 2014. *Teori Kesusastraan*. Jakarta: PT Gramedia.

Yanto, Oksidelta. 2010. *Mafia Hukum. Membongkar Konspirasi dan Manipulasi Hukum di Indonesia*. Jakarta : Raih Asa Sukses (Penebar Swadaya Group)

Sumber internet :

Wijaya, M. Taufik Budi. "Suap di Penjara" 14 Mei 2014.  
<http://mtaufikbw.wordpress.com/2011/02/23/suap-di-penjara/>

"Abraham Samad: Terpidana Koruptor Diduga Sering Suap Sipir" 14 Mei 2014.  
<http://www.solusinews.com/20130918/abraham-samad-terpidana-koruptor-diduga-sering-suap-sipir-penjara/>